

Majlis Penyampaian Hadiah Kreatif Bahana, Hadiah Peraduan Menulis Surat Rasmi & Surat Kiriman

Ucapan Menteri Kebudayaan, Belia dan Sukan, Yang Berhormat Pehin Orang Kaya Pekerma Laila Diraja Dato Paduka Awang Haji Hazair bin Haji Abdullah di Majlis Penyampaian Hadiah Kreatif Bahana Dewan Bahasa dan Pustaka (DBP) - Syarikat Minyak Brunei Shell Sendirian Berhad (BSP) 2009 dan Penyampaian Hadiah Peraduan Menulis Surat Rasmi (PMSR) dan Surat Kiriman (PMSK) pada hari Sabtu, 13 Zulhijah 1431 bersamaan 20 November 2010 bertempat di Balai Sarmayuda, DBP, Berakas.

Bismillahir Rahmanir Rahim

Assalamualaikum Warahmatullahi Wabarakatuh

ALHAMDULILLAH, bersyukur kita ke hadrat Allah Subhanahu Wata'ala kerana dengan limpah kurnia-Nya jua, dan kerjasama yang padu dan erat semua pihak Dewan Bahasa dan Pustaka (DBP) khususnya Bahagian Perancangan Majalah dan Jurnal dapat mengungkayahkan sekali lagi Majlis Penyampaian Hadiah Kreatif Bahana DBP-BSP 2009 dan Majlis Penyampaian Hadiah Peraduan Menulis Surat Rasmi (PMSR) dan Peraduan Menulis Surat Kiriman (PMSK) Sempena Memperingati Jubli Emas Bahasa Melayu Sebagai Bahasa Rasmi Negara Dalam Perlembagaan Negeri Brunei 1959 (1959-2009) bagi tahun 2010.

Di kesempatan ini, saya merakamkan ucapan ribuan terima kasih kepada DBP yang telah mengundang saya sebagai tetamu kehormat pada majlis penyampaian hadiah pada pagi ini.

Saya dimaklumkan bahawa Hadiah Kreatif Bahana yang diungkayahkan ini telah berjalan bagi jangka waktu yang lama dan ini merupakan kali yang ke-35, sementara PMSR dan PMSK bagi tahun 2010 adalah sempena memperingati Jubli Emas Bahasa Melayu sebagai bahasa rasmi negara dalam Perlembagaan Negeri Brunei 1959.

Bagi Hadiah Kreatif Bahana, kerjasama strategik dengan Syarikat Minyak Brunei Shell Sendirian Berhad (BSP) bagi sekian lama merupakan komitmen pihak BSP yang juga ingin melihat adanya perubahan yang boleh membantu perkembangan dan kerjasama dalam sama-sama menangani ke arah memperkasa bahasa Melayu di negara ini.

Bidang penulisan kreatif dan kesusasteraan memainkan peranan positif dan menyumbang kepada pembangunan masyarakat sama ada di negara maju mahupun negara membangun.

Penulisan puisi, cerpen dan novel mencerminkan pola pemikiran intelek dan pencapaian pembangunan sesebuah masyarakat baik secara mental, fizikal mahupun spiritual. Melalui penulisan dapat membawa masyarakat berfikir, mengimbas semula, menilai dan menghargai, melihat ke hadapan, dan melibatkan diri mereka kepada pembangunan bangsa dan negara secara positif dan menanamkan semangat jati diri ke dalam diri mereka. Pembangunan sesebuah negara dan bangsa memerlukan perubahan minda dan persepsi masyarakat dan rakyat yang mana ini dapat dicapai melalui bidang kesusasteraan dan penulisan.

Penyebarluasan pemenang-pemenang peraduan yang dipertandingkan perlu dibarigakan dalam bentuk yang lebih meluas lagi bukan hanya setakat diterbitkan melalui majalah keluaran DBP sahaja malahan lebih daripada itu terutama ke sekolah-sekolah dan institusi-institusi pengajian tinggi di mana penyertaan banyak datang daripada kalangan pelajar dan penuntut-penuntut.

Sehubungan dengan ini, di samping menerbitkan 'Bahana' yang memuatkan butir diri atau curriculum vitae dan hasil karya penggiat sastera tanah air yang dijadikan sebagai sumber rujukan, DBP seharusnya sudah mempunyai data bank yang lengkap dan komprehensif serta terkini (up to date) mengenai dengan senarai sasterawan dan penggiat sastera yang terdiri daripada golongan veteran, pertengahan dan pendatang baru atau contemporary di Negara Brunei Darussalam.

Data bank atau data base sasterawan dan hasil karya sastera dapat dijadikan sebagai kayu pengukur mengenai dengan perkembangan sastera tanah air dan juga dapat dijadikan sumber kajian mengenai dengan perkembangan dan penghayatan hasil-hasil karya sastera sama ada ianya selari dengan matlamat dan aspirasi pembangunan sosio-ekonomi negara dan bangsa.

Ini adalah bertepatan dengan peranan sastera dalam pembangunan bangsa dan negara, dalam mana karya-karya sastera tempatan menyumbang kepada memasyarakatkan dan merakyatkan pemikiran dan persepsi masyarakat dan orang ramai selari dengan wawasan dan matlamat negara sama ada ianya berkaitan dengan penghayatan falsafah negara - 'Melayu Islam Beraja'; mendorong masyarakat untuk melibatkan diri kepada pembangunan ekonomi dan menuju kepada Wawasan Negara 2035; menanamkan semangat jati diri yang kental kepada setiap anggota masyarakat khususnya golongan belia dan muda; mendekatkan masyarakat kepada agama; menzahirkan masyarakat dan generasi yang penyayang dan pemedulian; dan memberikan kesedaran kepada anggota masyarakat untuk patuh kepada undang-undang dan peraturan negara serta bertanggungjawab pada menjaga keamanan dan ketenteraman negara.

Merakyatkan bahasa Melayu adalah tugas yang tidak akan pernah selesai, justeru itu DBP perlu bertindak secara proaktif dalam memperkaya dan menyebarkan hasil karya sastera tempatan, di samping mengimbangi banjiriran bahan bacaan luar yang kadangkala lebih diminati oleh golongan remaja di negara ini. Kita perlu menghasilkan lebih ramai penggiat sastera daripada

golongan muda yang mempunyai ketajaman pemikiran dan penulisan serta daya kreatif sastera yang bermutu tinggi dengan perisian tempatan atau local content yang akan dapat membawa masyarakat berfikir dan bertindak mengikut arah tuju dan matlamat untuk mengangkat kedaulatan, pembangunan dan survival bangsa dan negara.

Tahniah dan syabas saya ucapkan kepada penerima Hadiah Kreatif Bahana ini, semoga dengan kemenangan ini akan dapat membakar semangat penulis tanah air untuk terus memartabatkan bahasa Melayu melalui karya-karya sastera. Dalam masa yang sama menghasilkan karya-karya yang boleh mengangkat semangat patriotisme dan memasyarakatkan pembangunan sosio-ekonomi negara.

DBP sebagai sebuah institusi yang memartabatkan bahasa Melayu dan sastera di negara ini, perlu mendapat sokongan yang padu daripada semua pihak sama ada daripada pihak kerajaan atau swasta. Pihak BSP telah memberikan sokongan awal tahun 1940-an, dan kesan jangka panjang kerjasama dan sokongan tersebut dapat dirasakan oleh kedua-dua pihak.

Saya dengan tulus ikhlas ingin merakamkan ucapan setinggi-tinggi penghargaan kepada BSP kerana telah memberikan kerjasama mengungkayahkan Majlis Penyampaian Hadiah Kreatif Bahana DBP-BSP 2009. Semoga kerjasama ini akan dapat diteruskan demi kepentingan negara terutama dalam memartabatkan bahasa Melayu. Di samping akan terus menanamkan benih-benih jati diri yang mantap sebagai warga negara yang cinta pada raja, bangsa, agama dan negara.

Dalam kesempatan ini saya juga mengucapkan tahniah kepada DBP kerana berusaha mengungkayahkan Peraduan-Peraduan Menulis Surat Rasmi (PMSR) dan Surat Kiriman (PMSK) Sempena Memperingati Jubli Emas Bahasa Melayu Sebagai Bahasa Rasmi Negara Dalam Perlembagaan Negeri Brunei 1959 (1959-2009). Peraduan ini seharusnya tidak diadakan secara bermusim sahaja tetapi hendaklah kerap dilakukan terutama sekali di jabatan-jabatan kerajaan kerana kita tahu penulisan surat, memo dan apa jua bentuk persuratan di dalam bahasa Melayu yang mantap dan betul adalah juga memberikan sumbangan yang besar ke arah memartabatkan bahasa Melayu di Negara Brunei Darussalam. Lebih-lebih lagi dalam konteks era infotelekomunikasi dalam mana penggunaan bahasa ringkas internet dan penghantaran pesanan ringkas (SMS) melalui telefon telah menjejaskan kemurnian dan keaslian bahasa Melayu itu sendiri.

Buat mengakhiri ucapan saya ini, sekali lagi saya ingin merakamkan penghargaan dan syabas kepada Pengerusi majlis, Ahli Jawatankuasa, dan mereka yang terlibat kerana berjaya menganjurkan Majlis Penyampaian Hadiah Kreatif Bahana DBP-BSP 2009 dan Majlis Penyampaian Hadiah PMSR dan Surat Kiriman (PMSK) Sempena Memperingati Jubli Emas Bahasa Melayu Sebagai Bahasa Rasmi Negara Dalam Perlembagaan Negeri Brunei 1959 (1959-

2009) bagi tahun 2010. Mudah-mudahan usaha yang dihulurkan itu akan mendapat ganjaran daripada Allah Subhanahu Wata'ala.